

T I L L A G A

að starfsreglum um kirkjuþing unga fólksins.

(Lagt fyrir 62. kirkjuþing 2021-2022).

Flutt af forsætisnefnd.

Frsm. Margrét Eggertsdóttir.

I. Hlutverk og skipulag.

1. gr.

■ Biskup Íslands boðar til kirkjuþings unga fólksins í samráði við forseta kirkjuþings. Þingið skal haldið að vori og starfi í tvo daga yfir helgi. Þingmál skulu hafa borist þingfulltrúum a.m.k. fimm virkum dögum fyrir þingdag.

2. gr.

■ Hlutverk kirkjuþings unga fólksins er að ræða stöðu og hlutverk ungs fólks í þjóðkirkjunni og í samfélagi kirkna um heim allan. Kirkjuþing unga fólksins er vettvangur ungs fólks til að hafa áhrif á starfsemi kirkjunnar.

3. gr.

■ Biskupsstofa annast undirbúning kirkjuþings unga fólksins í samvinnu við stjórn Æskulýðssambands þjóðkirkjunnar sem kýs verkefnisstjóra til að annast framkvæmd þingsins.

II. Þingfulltrúar.

4. gr.

■ Á kirkjuþingi unga fólksins eiga sæti fulltrúar prófastsdæmanna og KFUM og KFUK með málfrelsi, tillögurétt og atkvæðisrétt; alls 29 fulltrúar samkvæmt eftirfarandi:

- a) Reykjavíkurprófastsdæmi vestra, 3 æskulýðsleiðtogar og 2 ungmenni.
- b) Reykjavíkurprófastsdæmi eystra, 3 æskulýðsleiðtogar og 2 ungmenni.
- c) Kjalarnessprófastsdæmi, 3 æskulýðsleiðtogar og 2 ungmenni.
- d) Vesturlandsprófastsdæmi, 1 æskulýðsleiðtogi og 1 ungmenni.
- e) Vestfjarðaprófastsdæmi, 1 æskulýðsleiðtogi og 1 ungmenni.

f) Húnavatns- og Skagafjarðarprófastsdæmi, 1 æskulýðsleiðtogi og 1 ungmenni.

g) Eyjafjarðar- og Þingeyjarprófastsdæmi, 2 æskulýðsleiðtogar og 1 ungmenni.

h) Austurlandsprófastsdæmi, 1 æskulýðsleiðtogi og 1 ungmenni.

i) Suðurprófastsdæmi, 2 æskulýðsleiðtogar og 1 ungmenni.

□ Auk fulltrúa prófastsdæmanna velur stjórn KFUM og KFUK á Íslandi þrjá fulltrúa frá félögnum til setu á kirkjuþinginu sem hafa málfrelsi og tillögurétt en ekki atkvæðisrétt.

□ Fulltrúar skulu vera á aldursbilinu 14 til 35 ára, skráðir í þjóðkirkjuna og starfandi og/eða búsettir í því kjördæmi sem þeir sitja fyrir. Prófastar bera ábyrgð á tilnefningum og vali fulltrúa til kirkjuþings unga fólksins í samráði við sóknarpresta, presta, djákna, æskulýðsfulltrúa og aðra sem bera ábyrgð á kirkjustarfi í hverju prófastsdæmi. Hafa allir fyrrnefndir aðilar rétt til að tilnefna fulltrúa á kirkjuþing unga fólksins og skal senda prófasti þær tilnefningar. Biskup tilkynnir öllum sem að framan greinir um rétt þeirra til að tilnefna fulltrúa. Prófastur tilkynnir valda fulltrúa til verkefnisstjóra kirkjuþings unga fólksins.

□ Komi ekki tilnefningar úr héraði a.m.k. sex vikum fyrir þingdag frá próföstum skal vísa tilnefningunum til verkefnisstjóra kirkjuþings unga fólksins.

□ Skulu fulltrúar kirkjuþings unga fólksins vera valdir til tveggja ára. Geti fulltrúi ekki komist á kirkjuþing unga fólksins af einhverjum orsökum skal nýr fulltrúi (varamaður) vera valinn í hans stað sem hefur þá þátttökurétt til tveggja ára.

□ Boða skal til kirkjuþings unga fólksins í síðasta lagi tveimur mánuðum fyrir upphaf kirkjuþings. Verkefnisstjóra kirkjuþings unga fólksins ber að tilkynna völdum þingfulltrúum um rétt þeirra til setu á kirkjuþingi unga fólksins 4 vikum fyrir þingdag.

III. Þingsköp.

5. gr.

■ Kirkjuþing unga fólksins hefst með helgistund er biskup Íslands annast. Þá setur forseti kirkjuþings þingið og stýrir því fram yfir kosningu forseta og varaforseta.

6. gr.

■ Í upphafi kirkjuþings unga fólksins eru kosnir forseti, tveir varaforsetar og tveir fundarritarar.

7. gr.

■ Kirkjuþing unga fólksins starfar á boðuðum þingfundum og í þremur þingnefndum. Í upphafi þingsins skulu lögð fram mál sem fjalla á um á þinginu. Fulltrúum ber að skila inn þingmálum til verkefnisstjóra kirkjuþings unga fólksins og biskupsstofu a.m.k. tíu dögum fyrir upphaf þings. Þessum aðilum ber að koma málunum fullnum til þingmanna ekki síðar en fimm sólarhringum fyrir upphaf þingsins.

□ Eftir fyrri umræðu skal málinu vísað til nefndar. Forseti og varaforsetar skipa fulltrúa í nefndirnar svo og formenn þeirra. Formaður nefndar ber ábyrgð á skipulagningu nefndarstarfsins og getur kallað til utanaðkomandi aðila inn á nefndarfund. Formaður kynnir á þingfundi niðurstöðu nefndar. Mál eru samþykkt með handauppréttingu eða skriflegri atkvæðagreiðslu ef einhver óskar þess og dugir einfaldur meirihluti. Ályktanir og samþykktir kirkjuþings unga fólksins skulu sendar forsætisnefnd kirkjuþings til umfjöllunar og meðferðar.

8. gr.

■ Auk afgreiðslu mála skal kirkjuþing unga fólksins kjósa einn fulltrúa á kirkjuþing með málfrelsi og tillögurétt.

IV. Annað

9. gr.

■ Á kirkjuþingi unga fólksins skal að öðru leyti taka mið af þingsköpum kirkjuþings eins og við getur átt.

10. gr.

■ Starfsreglur þessar, sem settar eru með heimild í 8. gr. laga um þjóðkirkjuna nr. 78/1997, öðlast gildi 1. janúar 2022. Frá sama tíma falla brott starfsreglur um kirkjuþing unga fólksins nr. 316/2020, með síðari breytingum.

Greinargerð.

Í 2. mgr. ákvæðis til bráðabirgða í lögum um þjóðkirkjuna nr. 77/2021 segir að starfsreglur og samþykktir, sem kirkjuþing hefur sett eða samþykkt í gildistíð laga um stöðu, stjórn og starfshætti þjóðkirkjunnar, nr. 78/1997, haldi gildi sínu, eftir því sem við á, þar til kirkjuþing hefur fellt þær niður, breytt þeim eða sett eða samþykkt nýjar, þó eigi síðar en 31. desember 2021. Tillaga þessi er flutt í þeim tilgangi að tryggja það að áfram verði í gildi starfsreglur um kirkjuþing unga fólksins. Fáar efnisbreytingar eru gerðar frá núgildandi starfsreglum. Breytingarnar eru sem hér segir:

Lagt er til að aldursviðmið það sem getið er um í 1. máls. 3. mgr. 4. gr. breytist í samræmi við samþykkt kirkjuþings 2021 – 2022 í 23. máli þingsins þannig að fulltrúar skuli vera á aldrinum 14 – 35 ára í stað þess að hámarksaldur sé 30 ár eins og nú er.

Í 6. máls. 2. mgr. 7. gr. nógildandi starfsreglna segir að ályktanir og samþykktir kirkjuþings unga fólksins skulu sendar kirkjuráði til umfjöllunar og meðferðar. Þar sem kirkjuráð verður lagt niður við lok árs 2021, er lagt til að forsætisnefnd kirkjuþings skuli fá ályktanir og samþykktir kirkjuþings unga fólksins sendar til umfjöllunar og meðferðar þess í stað.

Gildistökuákvæðið breytist og er vísað til nýrra laga um þjóðkirkjuna nr. 77/2021 í stað eldri laga.

Þar sem ekki er um eiginlegar efnisbreytingar á starfsreglunum að ræða þykir ekki þörf á skýringum við einstakar greinar.